



UNIVERSITÄTS-  
BIBLIOTHEK  
PADERBORN

**D. D. Emanuelis Gonzalez Tellez, In Inclyta Salmanticensi  
Academia Collegii Majoris Conchensis Alumni, &  
antiquioris vespertinæ Sacrorum Canonum Cathedræ  
propriarii Interpretis; in Pinciano Sanctæ ...**

Additis Notis uberioribus ab Historia, & Chorographia

Complectens Librum Qvintum

**González Téllez, Emanuel**

**Francofurti Ad Moenum, 1690**

Capvt XXXIII. Idem Episcopo a Pistoriensi.

---

[urn:nbn:de:hbz:466:1-74544](https://nbn-resolving.org/urn:nbn:de:hbz:466:1-74544)

si ordinetur, non debet in gradu suscepto ministrare, nisi concessâ dispensatione à Pontifice, ut Innocentius in præsentî decidit. Rursus sciendum est, irregularitatis notâ affici clericum, qui ignarus censuræ, tam ignorantia facti, quam ignorantia juris ordinatus est, ut idem Innocentius ait: cum autem utriusque ignorantia idem sit effectus in præsentî casu, ignorantia autem facti excusare solet

à censura, *c. si verò 4. hoc tit.* sequitur utramque ignorantiam culpabilem extitisse in præsentî casu: quod evenire potest eo casu, quo nimirum crassa fuerit, aut supina, *ex c. 2. de consist. in 6.* Si autem ignorantia probabilis fuisset, excusaretur ab irregularitate, seu potius suspensione, ut docent Suarez, & Bonacina, & proximè Majolus *lib. 4. de irregul. cap. 34.* Marius Alter. *de censur. cap. 6. dub. 2.*

## CAPVT XXXIII.

Idem Episcopo <sup>a</sup> Pistoriensî.

**D**E monialibus tua à nobis f. requisivit, per quem eis sit absolutionis beneficium impendendum, si vel in se invicem, vel conversos, vel conversas suas, aut clericos etiam in suis monasteriis servientes manus injecerunt temerè violentas. Super hæc igitur tua consultiōni taliter respondemus, ut auctoritate nostra per Episcopum, in curia diocesi monasteria fuerint, absolvantur.

## NOTÆ.

I. <sup>a</sup> *Pistoriensî.*) Ita etiam legitur in tertia collectione, *sub hoc tit. cap. 6.* & in præsentî tantum deciditur, quis possit absolvere moniales ab excommunicatione incurâ propter violentam injectionem manuum in clericos; nam si mulieres regulariter absolvendæ sunt per proprium Episco-

pum, extraditis *in cap. mulieres, hoc tit.* multò magis moniales, in quibus ultra rationem sexus adest etiam impedimentum clausuræ. Unde rectè Innocentius in præsentî respondit, moniales manus injicientes in clericos, absolvi posse à proprio Episcopo: quod etiam procedit in monachis percutientibus clericum sæcularem, ut probavi supra *in cap. monachi.*

## CAPVT XXXIV.

Idem <sup>a</sup> *Vniuersis Crucesignatis.*

**S**I verè vos pœnitet de commisso, & plenè proponitis satisfacere de peccato, Dominum vobis credimus, immò novimus jam placatum. Si ergo <sup>b</sup> Veneti potuerint ad satisfactionem induci, & absolutionis beneficium meruerint <sup>c</sup> obtinere, securè cum eis navigare poteritis, & prælium Domini præliari. Quod si nec satisfacere fortè voluerint, nec absolvi, utpote qui non dolere, sed gaudere velint diu de commisso, permittimus vobis, ut cum ipsis usque in terram Sarracenorum, vel Hierosolymitanam provinciam, juxta quod inter vos convenit, & ipsos, vel honestè convenerit, navigio transeatís quanto minus poteritis, cum dolore tamen & amaritudine cordis, & sub spe veniæ communicantes eisdem. Cum enim jam à vobis majorem nauli receperint quantitatem, nec ad eam possint restituendam induci, aut etiam coarctari, si aliter fieret, videremini vos damnatum ex pœnitentia, ipsi autem præmium ex contumacia reportare: cum ad hoc debitum exsolvendum ipsi vobis maneant obligati, & ab excommunicatis exigere possit, & recipi quod debetur. Est autem <sup>e</sup> cautum in jure, quod si quisquam per terram hæreticorum, aut quorumlibet excommunicatorum transierit necessaria emerit, ac recipere potest ab eisdem. Præterea si paterfamilias domus excommunicationis sententiâ fuerit innodatus, à participatione ipsius familia excusatur. Licet ergo Dux Venetorum, dominus navium, tanquam paterfamilias domus in excommunicatione persistat; vos tamen tanquam ipsius familia, dum in navibus ejus fueritis, ipsius excommunicatio non continget, & excusabiles eritis apud Deum, si in excommunicatorum navibus existentes, cum dolore cordis sub spe <sup>f</sup> pœnitentiæ excommunicatis ipsis communicaveritis, in quibus communionem eorum nequiveritis evitare. Verùm cum & in terram Sarracenorum, vel Hierosolymitanam provinciam de navibus vos descendere contigerit, nisi Veneti ad satisfaciendum, & recipiendum juxta formam Ecclesiæ absolutionis beneficium inducti fuerint, vel compulsi, cum eis nullatenus præsumatis prælium Domini præliari. Ne si eis habentibus aliquid de anathemate in Crucis insurrexeritis inimicos, non prævaleatis in eos, sed terga vertentes fugiatis potius, & cadatis.

## NOTÆ.